

1 Timothawus

¹ Bulus, unan kaduran Yisa nanya nduka Kutelle unan tucu bite, nin Yisa likara nibinai bite. ² Udu kitin Timothawus usaun kiden nanya nyinnu sa uyenu, ubolu kutelle niin lisosin limmang, unuzu Kutelle ucif bite nin Yisa cikilari bite. ³ Nwa fo minu acara kube na nwa cinu udu makiduniya, so in Afisus bara uwantin among udursuzu niimomom ugang, barra nani nan nbellu iincizunu sa ligan, nulale ba dak nin salin yinnu sa katuwa Kutelle. ⁴ Na iwa dinja atuf kiti na nan nabin ninn nanan mmbellu ncizinu nimon sa ligan, allenge na idin dasu nin mannyardan nworu ibun ulin mbun katuwa Kutelle, nanya inyinnu sa uyenu. ⁵ Ukullun duka unere usu, ullenge na unuzu kibinai kilau, nanya nkpilizu ucine, nin inyinnu sa uyenu un kidegen. ⁶ Among in nanya ntanni na lasin inn nanya nile imone inani din liru hem. ⁷ Idinin su iso anan dursuzu nduka, vat nin woru na iyiru ille imon na iidin belle ba, sa ille imon na iinug in yisinaku. ⁸ Tiyiru uduka chaun, unit nwa suu kata nin nin. ⁹ Ti yiru nani uduka na ina ti unin bara unan kibinai kilau ba, bara anan nsalin dartu nduke nin nanit agbas, bara anan salin dortu kutelle nin nan kulapi, bara anan indinong nin na nan nyassu Kutelle, bara anan mollusu nacif nan na nnah, bara anan mollusu nanit, ¹⁰ bara anan suzu nzina, nin nanlime anan nnozu nan nanlime, anan tuzuzu nanit udu licin, anann kinu, bara anan nisilin kinu,

nin vat nimon inanzang, ¹¹ bara uliru ugongon Kutelle un mari, ullenge na ina ti ku nanya nyinnu. ¹² Inmini din godu Yisa Kristi cikilari bite, ullenge na atayi agang, bara na ana yene unan nyinnu ninghe amini na ce yi nanya katuwa me. ¹³ Meng, na nwan di unan tizogo Kutelle, unan tizu nanit ineau, nin nan nnanzu. In mini na se nkunekune Kutelle bara na nwadi nsue nanya ntanni, nin salin nyinnu sa uyenu. ¹⁴ Bara ngbardang nbolu Ncikilari bit nin nyinnu sa uyenu a usü in Yisa Kristi. ¹⁵ Ule ulirue ucinari ubatin iseru unin vat, bara Yisa na dak nanya nyulele ada tucu anan kulapi. Nanya mine miyari udiawe. ¹⁶ Vat nin nani, nwan buru nse nkunekune, bara nnanzang midiya nigh Kristi Yisa duro ngbardang nayi ashau me, vat, bara nso umuro kiti nalenge na iba yinnu nin ghe udu ulai sa ligang. ¹⁷ Nene udu kiti ngo nayiri vat, unan salin nkul, ulenge na idin yenju ghe ba, amere Kutelle cas, uzazinu ni ngongon udu kitime sa ligan. uso nani. ¹⁸ Timothy, usaun nin, nna fi ka kadure, bara imon ile na Kutelle wa bellin uworsu litife, bara ille imone yisina unan su Likum Licine! ¹⁹ Bara uyita nin nyinnu sa uyenu nin kibinai kicine. Ule imon na amon na nari inin uyinnu mine sa uyenu una nana. ²⁰ An Haminiyus nin Alekzanda, allenghe na nwa nakpa shintan ku bara inan duro nani nnanzan tizogo Kuutelle

2

¹ Ncizine vat, nwa ti nworu matiru tiru mine, nliran, ubunun nmong nliran, nin ngodiya isu

bara anit vat, ² bara agoh nan nale na idi natet adidya, nin woru tisu lisosin limang, nin nnonku kibinai nin ntoltunu liti nbun Kutelle. ³ Iele imon icineari, nin nimon seru ubun kiti Kutelle unan tucu bite. ⁴ Ullenge na adininsu anit se utucu vat, inin kuru ise uyinu kidegen. ⁵ Tidi nin Kutelle kurum, nin nan lisin kitik bit nan Kutelle warum, Unite Kristi Yisa. ⁶ Ullenge na awa ni litime utucu vat, uliru nanya kube. ⁷ Bara nanere, meng litinighe, iwa fereyi unan kadura nin nbellu nliru Kutelle. Indin belle kidegen: na kinu ba. Meng unan dursuzu nalumai nanya nyinnu sa uyenu nin kidegen. ⁸ Ndi nin su nanilime su nliiran vat niti, Ighantizin acara alau, na nin tinana nayi ba, na nin manyardan ba. ⁹ Nanere tutun na awani su kuyok nin toltunu liti, a ukifu liti a kibinai kicine, na nin titi nke nnit ba, sa nin nizinariya sa imon nwalu, sa imon nikurfun idia. ¹⁰ Na ise nani nin katuwa kacine, (ille imon na icaunari ine kiti nawani anan dortu Kutelle). ¹¹ Na uwani piziru uyinu kusari kurum nin toltunu liti. ¹² Na nyinna uwani unan dursuzu kiti ba, sa aso Udia kitene ngankilime ba, na aso tik. ¹³ Bara iwa burun uken Adamu ari, inin dofino nin Hawawu. ¹⁴ Na Adamu ari iwa rusuzu ghe ba, uwanere iwa rusuzu ghe nanya kulapi. ¹⁵ Nin nani, abase utucu barra umacu nnono, iwa li ubun nanya nyinnu sa uyenu nin su a ucin ulau nin nonku kibinai.

3

¹ Ubellu une ucineari, asa umon din inpiziru

aso udia kutyen nlira, adin piziiru katuwa kaci-ineari. ² Na iwa se imon tizogo liti ndia kutyenn nlanan ba, na ayita ules nwani urum, unan kifu liti, unan cin seg nin nonku kibinai, unan yiru nlira unan yiru in dursuzu kiti, ³ Na iwan seghe unan nso ntoro ba, na unan deddei nriu kiti ba, na aso unan yiru ncin nin nanit, unan salin nsu kubung, na wa yita nin nsu nikurfu ba. ⁴ Na amin kilari me gegeme, nono me tutun yiita anan nlanzu ghe nliru: ⁵ (Unit nwa dari uminu kilari me gegeme, abati iyiziyari ayinin uminu kilari Kutelle?) ⁶ Na awa yita upese nanya ndortu Kutelle ba, bara awa fo figiri, asso unan diu nafo shintag. ⁷ Na iseghe nin Lissa licine kiti nanit ndas, bara awa piru nimon ncin nin libarda nshitan. ⁸ Nanere a dikon, na iyita anan nibinai nisheu, na anan tinu tibaba ba, ⁹ na anan nson toro ba, na iwa yita ninkot nin nsu nimon inyi ba, anan naburi agib nin nibinai nilau. ¹⁰ Na ida dumunzun nani assa na ise ani nin kulapi ba ina ni katuwe. ¹¹ Nanere awane, na iyita anan nonku nibinai, na anan nijunguta ba, iyiita anan ncin ugegeme, anan nyiru ni nimon vat. ¹² Na adikon yita anan nawani alalarum, iyita anan yiru ncin nin nilari mine nan nono mine gegeme. ¹³ Inug allenge na ina su katuwa ti dikon gegeme, ina se liyisin licine, nin naye akone nyinnu sa uyenu nanya Kristi Yisa. ¹⁴ Ille inyerte ndisu udu kitife, indin cisu kibinai, na nin dandaunu ba mba dak kitife. ¹⁵ Assa udandaunu na uyenai ba, ndi nyertu fi unan yinno ucin nin kilari Kutelle, ka na idin yicu kilari nlira Kutelle kin nlai, fitak likara nin kidegen. ¹⁶ Vat bite ti yinna,

liyeshin ngbardang kiden Kutelleḡ karin, “awa duro liti nanya kidowo, anasu kibolo nanya nfip me, nono kadura me yene ghe, ibelle uliru me nanya nalumai, uyi yinna ninghe, iwa serughe gongon nanya kitine kani.”

4

¹ Nene nfip Kutelleḡ na bellin fwang, unaworo udu ubun amon anit ba sunu uyinnu sa uyenu, ini nibinai mine kiti nfip kirusuzo, nin madursu dursuzo nagbergenu, ² Libau kinu nin karusuzo isaka ukpilizu mine. ³ Ima wantinu usu zu nilugma, nin nli nimonli ille na Kutelleḡ na ke, ileḡ na udin nizu nin ngodiya, nanya nale na ida iyinin kidene. ⁴ Bara vat nile imon na Kutelleḡ nke icineari, tutun na imono duku ulle na iba nari ba asa isere nin godiya. ⁵ Idi lau bara na ina kusu inin nin nliru Kutelleḡ nin lira. ⁶ Asa ulizino linauna ile imone, uba so kucin kucine katwan Yisa Kristi, fe ulle na use liyisin nanya nyinnu sa uyenu, nin dofinu ndursuzu ucine na udofino. ⁷ Bara nani nari abin nawali nin nizogo Kutelleḡ, shono liti unan so unan yiru nanya ndortu Kutelleḡ. ⁸ Ushonu liti caun nin kubi cing, imon vat caun nanya ndortu Kutelleḡ, bara na uba ni ulai nyulele nin un cin dak. ⁹ Uliru ulele ucineari, ubatina nworo vat nanit seru. ¹⁰ Unnere nta tidin niu nin nfo kidowo, bara tidin nin likara kibinai kiti Kutelleḡ unan lai, ame unan tucu nanite vat massaman alle na iyinna sa uyenu. ¹¹ Dursuzo nani ileḡ imone, uti nani isu. ¹² Na umon nwa yassu fi bara na udin fitu ba, bara nani soḡ imon yenju kiti na nan nyinnu

sa uyenu nanya nloru, nin nyiru ncin, nin nsu, uyinnu sa uyenu, a kibinai kilau. ¹³ Ceo kibinai fe nyenju ninyerte, nin nwnu natuf, a udursuzu nimon udu kubi ko na mba dak. ¹⁴ Na uwa fillin uda diu ulle na udumun ba, na iwa bellin udumun, ligowe nin tardu nacara nadidia kutyin nloran. ¹⁵ Dirtino nsu nile imone, nā litife nan nya ninig, bara anit vat nan yene uli nbunfe. ¹⁶ Cinna seng nin litife, nin ndursuzu fe, dirtino nanya nile imone, bara usu nane ba tifi use utucu litife nin nale na idin lanzufi.

5

¹ Na uwa boro ukune iyizi ba, fwanghe acara naco ucif, mino uzaman nafo nuana fin. ² Zazina awani akukune nafo annah, nuan nishono nafo nuan nishono, nin kibinayi kilau vat. ³ Zazina awani ale na ales mine namo kuzu, ale na imal kunju. ⁴ Andi uwani ulle na ules me na kú, dumun nono nin nayalang, na icizin udursuzu nlanzu fiu Kutelle nan nya lilari mine. Na ibiya acif mine, bara na Kutelle din lanzu nmang nani. ⁵ Ame unan diru nles ulle na amē nkuno, na aceo kibinai me kiti Kutelle. Ashon liti nan nya nfo nacara kitik nin lirin. ⁶ Ame ulle na aceo kibanai me nlanzu nmang ame nkú, a ayita nin lai. ⁷ Ta isu ille imone, bara iwa se imon nvurzu. ⁸ Nanere ulle na amin kilari me nin li uana ba, anari uyinnu sa uyenu, akanti kulumai nin nanzang. ⁹ Na iwa nyertin lissa nmon uwani unan dirun les, na akus me darni akut kutocin ba, uwani nles urum. ¹⁰ Na iyininghe nin katuwa kacind, assa ana min nono gegeme, ayita washalang, asa ana kuzuzu abunu namara,

asa ana buzuno nikimon, asa ana suzu imon vat nin likara. ¹¹ Nanere alle na ales mine na kuzu ana isa kunjo ba, na iwa yertin tisa mine ba. Bara kubi ko na usu kidowon nkata likara mine, asa ipizira usu nilugma. ¹² Nan nya nlo libauwe, idinin shara natimine bara na inari uyinnu sa uyenu mine un burne. ¹³ Bara nani asa iso agballa. Nin dortu nilari nilari. Na asa iso agballa cas ba, asa iso anan kubellum. Ibelle ile imon na icaun ibellu ba. ¹⁴ Bara nani ndinin su awani abebene ale na ales mine na kuzu isu ilugma, imacu nono, imin nilari, na iwa ni shitan ku nfwang nnanzu katuwa bit ba. ¹⁵ Nene wang, among mine nlasina idofino shitan ku. ¹⁶ Assa uwani ule na adinin yinnu sa uyenu, adinin nawani ale na alles mine na kuzu, na abun nani, bara katawe wa ti kutyin lire kadiawe, bara ina bunu anan diru nales alle na ikunjo. ¹⁷ Na adidya ale na ina ghatin nani acara kutyin nlira, asa idin cinu nin nanit gegeme na ipatin uzazunu ulenge na iba ninani, umunu alenge na idin bellu idursuzo uliru Kutelle. ¹⁸ Uliru Kutelle nworu, "Na uwa nazu finafe nin nimoli kubi katwa ba," tutung "Unan katuwa uwesu tinonto me." ¹⁹ Kpada anan su nalapi nbun nanit, ngisine nan lanza fiu. ²⁰ Asa na ulanza nnu nan waba sa awatat ba, na uwa yinnin nin vuru liti ndia kutyen lira ule na ina tarda ghe uchara ba. ²¹ Ntafi ubun Kutelle, nin Yisa Kristi, a nono kadura Kutelle allege na ina fere nani, su ille imone, na uwa feru ba, yenje uwa su imomon nin su liti. ²² Na uwa tarda unit achara dsddei ba, bara uwa ti acara nan nya kulapin nmong, nafe litife so lau. ²³ Na uwa so nmyen cas ba,

kpina kamyen kagbagbai bara ukonu liburi nin nyeneyi kidowo fe. ²⁴ Alapi na mong anit di kanang, idin cinu nbun udu kitin shara, among dorto kidung. ²⁵ Nanere tutun nituwa nicine di kanang, ni nin nanę wang na ni nyeshi ba.

6

¹ Vat nale na idi licin, na ini an cinilari mine uzazunu ule na ukulun, bara iwa zoguzo lisa Kutelle nin liru me. ² Anung acin alenge na an Cinilari mine di nin yinnu sa uyenu, zazinan nani bara na inung nuanari, na idirtin nsu nani katuwa vat, bara na an Cinilari mine anan yinnu sa uyenuari, anan su minere. Dursuzo, ubellu ile imone. ³ Asa umon dursuzo imoin imon ugang, na ayina nin liru ucine bite ba, ulirun Cikilari bite Yisa Kristi, nin dursuzun liru ucine. ⁴ Adin fo figiri na ayiru imon ba, unan rusuzu nanit nin suzu mayardang nin tigbulang tinanzang kika na ivira din nucuku, nin fiu kibinai, tizogo nin vuruzu unanzang, ⁵ a mayardang nanit asurne nin nibinai nibishe, anan diru kidegen, alenge na iyira libau Kutelle nafo lin sesu nikurfungha. ⁶ Liru Kutelle nin kibinyi kirum useri udia. ⁷ Bara natina danin mon nyaya nyi ulele ba tutung na tima nyiu nin nimon ba. ⁸ Nonkon nari nibineyi bite nin nimon nowo ille na tidumon nin nimon nli. ⁹ Alenge na idunin su ise imon na cara assa ideu nanya tikanci nin libarda Nshitang, udu nanya tilalang tidiya nin kuna nizin nlanzu, nkul, umusu inrika na assi uwultino anit udu nanya nkul. ¹⁰ Usu nikurfungh unin nere ucizunun katah kananzang

vat. Among allenge na ina tinibineyi ku, ina lasin nnannya nyinnu sa uyenu, ina kulzu atimine nin na buri asirne saliga. ¹¹ Fe unit Kutelle na uwa ti kibineyi fe kitene nile imone ba, pizira nlau kibineyi, udoruu Kutelle, uyinnu sa uyenu, usuu, nsheu kibineyi nin nonku liti. ¹² Su liyisin licine lin yinnu sa uyenu. Use ulai salingang ule na iwa yicilla fimu. Ukuru ubellu imong i cine nbung nan nizi iba gbardang. ¹³ Ntafi nbun Kutelle unan nimon nlai vat nin kirrsifi Yesu ulenge na awa belling kidegen nbun Buntus Bilatus. ¹⁴ Bara nani dorto udukye gegeme, sa uvurzu, udu kube ko na cikilari bite Yesua madak. ¹⁵ Udak me mayitu kubi kucine nafo na unan nmare na cheu, ame unan ulikara chas ugo unan tigo nin cikilari unan tigo. ¹⁶ Ame unan salin nkul nin nle na assosin nnanya nkanan mo na umong wanya a do kupowe ba. Na unit wanyaa ayeneghe ba sa ayeneghe piit ba uzazinu nin likara saligeng di kitime. Uso nanin. ¹⁷ Belle anan seh nanya nyi ulele na iwa fo igiri ba, sa it nibinnei mine nimon nyi ille na ima malu. Nin nani icheu nibineyi mine kiti Kutelle. Ule na adin nizauri uuse kidegen vat tilanza imang. ¹⁸ Belle nanin isuu imon icine, iso nan se nanya katuwa kacine, iyit washalang, nin nibineyi nnizu. ¹⁹ Nloli libower inug ma ciw atimine imon icine ule na idin cinu, ima se ullai ucine. ²⁰ Timitawus, mino ille moa na iwa nifi, suna uliru kinu nin manyardang mananza man kinu na idin suu mun uyiru. ²¹ Among anit din bellu alle adwade inani nazu nnannya nyinnu sa uyenu. Na ubolu Kutelle so nan ghinu vat.

Amo New Testament
The New Testament in the Amo language of Nigeria
copyright © 2020 Door43 World Missions Community

Language: Timap (Amo)

Translation by: AFenlason, ALHASSAN SUDA, Chrispher Ishaya, James, Kawusu David, Pungs Makarios, Zephaniah A. Isau, tab04-nig, tab12-nig

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-07-06

PDF generated using Haiola and XeLaTeX on 21 Feb 2024 from source files dated 31 Aug 2023

cb0040a9-2597-55c7-975b-461d5a397911